

書名 空同先生集六十三卷 嘉靖九年序刊本
 撰者 明 李夢陽 撰
 卷 卷二十
 內容分類 集-別集-明中葉
 索書號 倉石:40084
 編號 4008000

卷二十

空同先生集卷第一

賦一十首

疑賦

思賦

省愆賦

緒寓賦

俟軒子賦

一十首

疑賦

鈍賦

述征賦

宣歸賦

寄兒賦

竹石賦

[彩色首頁1](#)

[東洋文化研究所漢籍目錄 編號: 4008000](#)
[東洋文化研究所漢籍目錄所藏漢籍善本全文影像資料庫 索書號: 倉石:40084](#)
[漢籍善本全文影像資料庫文本空同先生集六十三卷 嘉靖九年序刊本](#)
 版權所有: [東京大學](#) [東洋文化研究所](#)
[使用上的注意事項](#)

乾坤高卑易矣。星辰在下。江河逆矣。天喬喬天。

北郡李夢陽撰



空同先生集卷第二十

北郡李夢陽撰

詩 七言歌行四十首

題詠二十首

李進士醉歸圖歌

鄭生書樓歌

畫魚歌

林良畫兩角鷹歌

吳偉松窓讀易圖歌

鍾欽禮山水障子歌

贈郭氏畫登遊快閣歌

觀序上人所藏陶成畫菊石歌

題畫二首

張侯藏張翬山水歌

畫馬行

西山湖春遊圖歌

畫竹行

題京口人山水圖

題畫搖筆成詩

錢選畫張果圖歌

周文靜畫雪山圖歌

題畫山水送人還歙

壽兄圖歌

游覽九首

登天池寺歌

御製廬山周顛碑歌

遊棲賢橋歌

懷玉山歌二首

鐵柱引

快閣引

九江陸還南康望東林

觀水簾泉歌

周唐初體五首

楊花篇

明星篇

漢京篇

去婦詞

蕩子從軍行

長短句三首

沈大夫行

雪山歌送萬子

廣州歌送羅叅議

用張王體二首

冰車行

鹽井行

用李賀體一首

清夜行

題詠二十首

李進士醉歸圖歌

誰將一幅雪白絹放筆橫掃黃金殿五雲飛花白片
片李生胡此開生面御河塵昏楊柳暮彷彿初罷南
宮宴 皇帝龍飛十二春同時三百登要津曹生李
生余最親曹甥李也傳經人光耀雖云丈夫未不聞
致君須致身自汝白手扣闈闔想像紫陌行麒麟曹
留李歸事亦變李生意氣圖中見醉歸扶起杏林下
眼花熟人無識者飛鳥來窺進士巾游絲故習誇官
馬卽論此馬亦有神畫出紫焰方瞳真嚼勒齧膝如
待人長行大步不動塵絡頭鞵純用銀細巧似織
翻江鱗汝昔出門驢無騎曹生共被甘鹽齏比許欲
入周召列成就恥與蕭朱齊於乎男兒一旦榮幸果
如此生不報國老空悔

鄭生畫像歌

巖風颭颭樹葉赤秋林紫氣丹丘積問君胡爲坐石
根微吟極望天雲昏南歸舟楫杳將滯故園花鶯當
復存浚儀張生好作筆貌爾形似兼其魂細模妍描
豈乏手傳真水月烟中柳意氣朗如千里骨精神合
居萬人首憶昨觀君飛射時彎弧走馬實男兒更求
張筆須傳此欲識豪雄豈啻詩

畫魚歌

呂公手持畫魚障清晨掛我北堂上島嶼晴開雲蕩

蕩衆魚出沒隨風浪四壁蕭蕭起寒漲嗟此數尺障
天機妙入神信手掃絹素慘澹開金鱗濠梁斷裂東
津遠任公掣釣滄溟晚此時天黑衆魚出鼉鼉徙穴
蛟龍返或言乘潮萬魚集細小亦趁雲雷入只尺波
濤有得失屈強泥沙恐難立細觀又似洪河風崑崙
旣道龍門通霹靂殷殷行地中鯉眼下射盤渦紅非
獨一身生羽翼亦有數子隨飛龍山根小魚更無數
鱣鮪昂藏噴煙霧美人修竿淇水闊漁子孤舟洞庭
暮我生好奇古覽畫心不動呂公此障誰爲之令我
一見神色竦想當經營始筆端萬鈞力五湖齊傾四
海立空牕滾滾拔浪急陽侯逆走天吳泣不然千魚
萬魚何由集我聞神性物變化不可料點睛破垣古
有兆卽恐風雷就壁起饕人揮刀莫相笑

林良畫兩角鷹歌

百餘年來畫禽鳥後有品紀前邊昭二子工似不工
意吮筆決皆分毫毛林良寫鳥祗用墨開縑半掃風
雲黑水禽陸禽各臻妙掛出滿堂皆動色空山古林
江怒濤兩鷹突出霜崖高整骨刷羽意勢動四壁六
月生秋颺一鷹下視睛不轉已知兩眼無秋毫一鷹
掉頸復欲下漸覺颺颺開風毛匹綃雖慘澹殺氣不
可滅戴角森森爪拳鐵迥如愁胡背欲裂朔雲吹沙
秋草黃安得臂爾騎四馱草間妖鳥盡擊死萬里晴

胡雁麟詩載云題畫
自杜諸篇外唐無繼
者手不甫畫虎圖
子瞻湘江疊嶂夜遊
圖韓子蒼龍眠圖
伯生墨竹楊廉夫青
蓮像薩天錫鐵鉞圖
皆有可觀而骨力變
化遠非杜比惟李獻
吉吳偉林良等六詩
模寫精絕而摹寫維
模幾欲共杜並驅真
傑思也

空灑毛血我聞宋徽宗亦善貌此鷹後來失天子餓
死五國城乃知圖寫小人藝工意工似皆虛名校獵
馳騁亦末事外作禽荒古有經 今皇恭默罷游燕
講經日 御文華殿南海西湖馳道荒獵師虞長俱
貧賤品紀白首金爐邊日暮還家無酒錢從來上智
不貴物淫巧豈敢陳 王前良乎良乎寧使爾畫不
直錢無今後世好畫兼好畋

吳偉松窓讀易圖歌

仄巘泉流石無數素壁濛濛起烟霧君家屋宇在城
市何以堂上生松樹側聞江夏生氣酣掃毫素絕筆
風雷拔地起意匠鑿天天爲怒泰山古根生眼前俄

頃縮出徂徠山懸蘿掛薜裊裊黑復有草舍松之間
惚間老人髮髮秃手翻一編周易讀空山瑟瑟翠濤
激長干冥冥暮花撲遠知旣已死希夷不復作青丘
石室杳何許恍然置我此溪壑翻愁一夕雷電入六
丁追書上廖廓又畫石下根屈曲如老龍胡奴瞑踏
孤岩松蓬頭赤脚露兩肘月明汲泉山澗中却憶前
年 召畫師江夏吳生亦與之短褐垢臉見 天子
禮貌雖村骨格奇 帝令待 召仁智殿有時半酣
被 召見跪翻墨汁信手塗白日慘澹風雲變 至
尊含笑中官羨五侯七貴爭看面請觀此幅松舍圖
黃金失價連城賤吳生吳生太氣岍一言不合輒投

硯

鍾欽禮山水障子歌

鍾生始學戴文進後來頗自出機軸山林槎枒波漫
靡骨格雖傳氣不足此幅樹石差可意綴得茅堂傍
江麓連山遠勢亦可取轉折頗似蕭湘曲竹嶼陂陀
九疑隔蒼梧洞庭濕雲白黃陵美人把瑤草天寒日
暮行空澤鷓鴣雙飛鴻鴈宿榭樹颯颯江水碧細看
谷口花又疑武陵源孤舟欲往不可得對此彷彿聞
清猿亭間更著四老翁衣冠各異鬚眉同紫芝山深
石漠漠悵望萬里來悲風人生有形貴自適我今胡
爲塵埃中觀盡感事面顏紅有畫如此何必工歌徹

日送滄洲鴻

贈郭氏畫登遊快閣

昨朝快閣舉目無江湖凭闌二豪俱徘徊把杯思欲
丹青寫之人則無城中郭清狂一生弄丸戲洪鑪方
瞳如水霜半顛展紙爲掃登閣圖邑城隱見林木扶
畫我快閣上半天風立樓觀孤急流波濤沸欲動前
山雷雨勢可呼二豪意態各亦足彷彿指說荆與巫
回顧東海猶一盂是日南風萬船集江隅郭亦畫出
檣之鳥精密似跨北海杜筆力頗凌江夏吳江中流
雲西北徂又若萬里獨往朝京都我心與客方念此
郭能畫之真奇士

觀序上人所藏陶成畫菊石歌

陶生畫菊石老草有筆力此石與此菊今爲序公得
兩株徙倚石根前古石苔蘚屈連錢復有餘株散在
地平坡雜草青烟絲回株點綴花翩翩含姿弄態不
一足背向纖穠皆可目突如大家貴介女珠翠雖搖
氣莊肅近時名手計汝和此生筆力方之過江東徐
霖學畫石效鬪差勝王與何亦知神品多冥契下筆
巉巖拓高勢石磊磊兮菊漫漫清霜古路花斑斑遠
意頗類東林山東林昔築蓮花臺彭澤攢眉不肯來
歸家對菊獨銜杯序公叢林號白足不重蓮花番重
菊終然畫餅不充腹何如種向西山麓秋林寒芳采
服食煮石煉藥亦爲得愛鷹愛馬古有之不獨序公
何太息

題畫二首

雪城陰陰氣蕭瑟鄭生提畫來相訪面顏戚促意不
樂告我欲買南行舫覽畫指點色惆悵雨倒江翻拔
曾浪君不見江上篔簹翁歸遲水逆憂天風
江寒雨急莽無路漁人撒網乘烟霧魚蝦瑣細不直
錢汝休輕觸蛟龍怒展畫見此心中悲犯嶮覓利古
所卑只今風浪無晨暮爲問安流歸者誰

張侯藏張翬山水歌

張翬有名成化間大塗小抹成山水樹石燥硬筆意

古往往人間落片紙此幅粗淺色更枯或謂非暈出
其子張侯識鑒天下精物物如金見沙底爾家圖畫
千萬軸素壁高堂安用此寧知上智不滯物牝牡不
貴貴者骨尺山即如對玄圃草屋臨岬氣出沒岬根
林堂頗清迥遠雲澹沲開秋嶺霜蘿細紆岩檻暝昏
猿接掛花溪靜自從去年拋棄官夢想山遊駕江舸
見此拂衣便欲往攀緣轉玩情無那岬亭更著一人
坐斗絕看書樹婀娜張侯豪曠人共知敏捷言談皆
勝我鹽車鬱沒騏驥棄蹇拙逢時每相左崑崙洞庭
不我隔異時倘結煙霞果

畫馬行

嗚呼駢駟不可見世人任耳不任目玉勒金羈滿地
行可道中無千里足君收此馬畫者誰疑豪苦意求
其骨尺縑颯爽毛鬣動凌風似欲真馳突曹霸畫馬
無此精拂拭慘澹神氣生細觀決非近代物印押剥
落無姓名四海只今多戰爭安得此馬一敵萬絡頭
騎出千人驚擒戎破虜任橫行

西山湖春遊圖歌

我家掛出西山圖上有西山下西湖上堂見者怒氣
鹿問客何所怒何得生此嗔縱使撐天拄地無比倫
古人局量非今人罅間雖添兩禿松孰與遠勢開心
胸銀山鐵壁 皇陵東彷彿下走追飛龍一曲一折

苦不易可憐片素騰雲氣落花冥冥萬壑靜白日杲
杲千巘碎森沉不見雷霆伏照爍盡壓金銀寺回思
開疆 帝秉鉞燕山突立五鳳闕錦綉離宮巖嶮入
龍權水戲滄溟竭君不見輦道哀湍瀉松栢摧枯虎
出沒至今守僧住湖傍琉璃湧動鼉鼉忙事關體統
畫合諱點綴半露還半藏伊昔休沐屢酣此耳邊尚
憂金琳琅上林花艷何所無東風只恁吹西湖夾岍
小杏欲爛熳騎驢紗帽西郭途同行康何成我徒秣
須十錢買尺魚旋挑土薺甘如酥朝來青暮望湖紫
衣行童隨挈壺大者鼓簧小吹竽爛醉花下鳥每呼
汝曹何處吾已翁十年獨看梁園紅傷心痛定忍復

說回首萬事真匆匆嗚呼故舊離合誰獨無使我不
悲堂上圖使我不悲堂上圖

來青軒名
望湖亭名

畫竹行

鄢陵王孫稱竹溪手自栽竹堂東西已詫白晝雷雨
入遽使六月秋雲低王孫拈筆傳竹神不得乃憶能
傳人黃筌異世與可滅本朝頗數東吳真一幅千金
擲不惜有時容來掛之壁壁上階前翠相射風行琳
琅曼摩仄四座慄慄生寒色陂陀沙嶼意勢遠洞庭
木落瀟湘晚白雲悠悠去不返叢篁寂寞雙妃怨於
乎畫形難畫心黃陵鷓鴣啼至今月不常盈日中是
人生何必長悲吟堂有佳賓膝有琴美酒一酌還一

掛竹溪子掛竹葉歌竹枝醉據玉案吹參差左杯酌
竹右畫師李平孔乎吾則誰更須名手畫六逸并畫
王孫逸爲七

題京口人山水圖

青山逶迤如北固山下彷彿京口樹茅堂花蹊三月
暮萋萋舊草春遊路一從畫師掃煙墨客堂日夜流
江色江色依微帶甕城遊子歸魂逗南北

題畫搖筆成詩

去年得歸離江州七日遂登黃鶴樓南風捲江浩呼
洶逐轟欲翻鸚鵡洲七澤莽昧不入眼孤舟屈曲襄
河轉數月已擲檀家湖夢飛每到羊公峴峴脚山南
東道楊秀川公子醉悲秋檻邊斑竹古猶活雲石寂
寞蒼梧愁重華馭遙不可叫白沙黑猿踈樹幽看圖
彷彿曾遊處素壁青天漢水流

錢運書張果圖歌

張果者中條山人也武后聞其有道術召之果
遽死後復出往來汾晉間末宋使李嶠齋爾書
造請焉果至舍集賢院詔肩輿入禁中問治理
神仙之事帝悅焉欲以玉真公主妻果果不從
辭還山果蓋剪紙驢乘之不則折收巾笥中而
錢圖故落於俗家今爲河守李得矣

張翁紙驢真有無錢也何意傳其圖印記雖明幅斷

裂李侯完之亦奇絕所恨圖尾錢有詩就蛇添足將
無淩憶昔翁來集賢院八宮詔許有輿便一日聲名
人主動千年面目吾今見帝貌深沉玉榻雄侍人一
異三人同漢皇信有瑤池降秦始枉慕蓬萊通玄言
未竟鈴殿風寸驢躍出青箱空有僮追捉雙眼紅此
驢蹠躡盤當中李侯一看一絕倒每稱獨苦嗟良工
細觀張翁骨格古徐福五利寧其伍曰嬪真令天下
疑造歸轉覺皇心蠱長生殿前牛女辰廣寒仙桂舞
鸞身世間但識申師巧誰解中條於浪人

周文靜畫雪山圖歌

周生雪山世稀見遠水近水一疋練玉嵯嶽嶮插湖

脚粉筆徐移掃高閣瓊枝鐵柯兩迴亞龍鱗犀甲欬
參錯林風颯颯急霰起白日冰花逐毫落天愁地慘
意各出霧合颺回勢逾惡人言四時冬最難周生善
雪仍善山虛堂突立萬仞壁尺素乍轉千重灣彷彿
寒封洛陽道得無白擁藍田關袁安甘卧幾時起退
之遭竄終召還倚山亭亭一孤松及嵯峭壑盤其中
分毛聳幹一何傑畫者有意排嚴風君不見古來梁
棟必此物願君愛之頻拭拂

題畫山水送人還歛

黃山沙溪杳何許圖之山水無乃是軒轅宮宰相里
山人一出彌荆杞石林漠漠蹊徑苔霜鶴夜悲猿嘯

哀紅顏踪跡半湖海白頭覽畫思歸來溪頭繫一舸
畫師本無意宛如倦游者無復舟航事水雲迤邐山
雲高靜定方知動者勞回思少日懽娛地至今夢寐
猶波濤

壽兄圖歌

荷嗟我鳳生三雛二雛成立少者殂為巢抱卵兩不
易自挺獨立身羈孤兄既躬耕濁河岸弟亦塌翅青
雲途兒長女大願各足鷄肥酒熟時相呼仲氏吹篪
填者伯兄今六十我半百敢言意氣激墮俗要使紛
紛觀標格大梁張路固好手湖州生絹照眼白當堂
掉臂掃丹墨倏忽老面開生色盤松歲蕤雜花遠雲

犀石几文茵輒靈芝底出琅玕瓶蟠桃突幾琉璃椀
鶴行昂藏疑欲啄復綴山麋意逾宛大公烏紗微俯
身中心愛弟愛復親次公擎服青羅巾傍兄祗順情
性真壺陳爵設卽未舉儼如酬勸言辭諄其言伊何
懷二人飄風烈烈吹三秦銜悽西望道路阻高丘莽
杳狐兔隣又如自叙傷夙昔衰暮安寧思苦辛季冬
十日兄生日今日天開皎日出長裾珠履坐上滿剝
烹椎牛酒盈室此時此圖挂之壁觀者嗟咨黯如失
二公揖遜恰相向回看乃在畫圖上骨法形神各不
疑輿臺緝御俱惆悵逶迤拂拭諸欲動展轉顧惜嗟
宗匠瓶中梅菊誰致女倒映芝桺故相盪鞞灼真回

綺席春芳香解溢金壘鬯兄今健飯猶廉頗丹砂我
煉尋黃婆復聞張生善山水買絹請掃青嵯峨嵯峨
一掃一千幅一年一幅南山歌

游覽九首

登天池寺歌

廬山絕頂天池寺鐵瓦為堂白石柱傳言周顛勞
聖祖天眼尊者同顛住嶮絕下闕無底壑屈曲穿緣
惟一路頃屬秋晴強攀陟俯之四海生雲霧岷峨纍
垂西向我杳杳長江但東注君不見寺東岨石鐫竹
林穹碑 御製山之岑周顛胡不留至今周顛胡不
留至今虎啼日暮愁人心

御製廬山周顛碑歌

廬山絕頂白鹿臺上有 御製周顛碑石龜下蹲高
結螭天葩震烈雲漢回文古雨漢仍過之憶昔草昧
龍虎鬪黃旗紫蓋顛能知顛也似真還似癡 帝非
感悟寧用茲百年勢移功漸泯碑亭毀裂將及碑訶
持白晝鬼神泣光耀天陰雷電隨先朝雖允僧奏劄
修葺其如歸有司有司有司顛莫疑試看碑文碑後
詩

遊棲賢橋歌

雷泉峽激石龍從日湍山陷回光動吁嗟此壯觀萬
古誰為開渦黃潭黑窈莫測秀黛碧玉何崔嵬人言

窟底有龍卧氣吐白晝常風雷去年重九登吹臺翹
望名山思嫋娜今年今日誰料吾醉踏窮山躡礧礧
拂衣欲上萬仞壁濯纓還就孤岬坐秋風吹林猿狖
語浮橋橫空裊相拄嵐寒細飄瀑布雪峰雲破碎芙
蓉裂金支瑤草真有無縹緲仙燈暮明滅君不見此
橋今千年谷冷跡絕無人烟岩劓苔蝕石漠漠太白
紫陽俱我前對此不須更慘愴明朝且上香爐巔

懷玉山歌二首

懷玉之山玉爲峰四面盡削金芙蓉東峰破碎瀑布
落有潭十八龍爲宅山頭草堂開者誰斬木通道余
心悲白猿嘯雨岩竹裂石路上天風樹吹我聞龍乃
變化物羣然卧此龍何爲胡不滂沱惠下土一洗四
海無旌旗

君不見見懷玉山山七盤盤盤上無極陰霾白日岬洞
黑隆冬雨路誰來得稻田月池山上頭半天有地今
我遊石壇剥落古佛棄木落俯見東岩湫湫中巨魚
長如人紅眼射日翻金鱗天台樵源在何許采藥避
秦此處吾告汝

鐵柱引

豫章古城牙城南何年鑿井置鐵柱井深江通沒不
見時寒水涸始一露玩之非石亦非鐵孤立差牙若
枯樹人言旌陽鎖水毋此語荒唐奚所據或云藉此

壓江濤茲理或有誰者勞顧今伏臘盡奔走歸美真
君瑤殿高金燈翠旗日來御雕闌玉檻園周遭俗論
紛紛不須辨秋風日暮塵滿縣

快閣引

四月月圓登快閣天半晚牕雷雨入邑中上客携酒
至歐陽羅子咸來集去年爲閣初築臺我時登之雷
雨來神明似有兩歲約晴霧歛值千山開千山迴轉
江中流徙倚闌干增暮愁夕日下看衡嶽破波濤左
顧匡廬浮苦思去年生盜賊大江南接江之北烽火
遙連海岱紅殺雲眼見鄱陽黑斯邑洶洶今始安我
今對酒能不寬諸君稍減般移苦百姓新回種植權
北風江湧月東來更說夙昔俱停杯陰晴倉卒不自
料萬事恍惚誰能猜潢池暫殄干戈釁向隅猶抱瘡
痍哀勸君置此勿復道放歌且與雲徘徊

九江陸還南康望東林

匡廬山北東林寺前年八月遊曾至只今馬出蓮峰
道西望東林但縹緲風吹柵欒猿晝啼卻憶石門臨
虎溪舊聽石瀨尚在耳雷燒碑樹今應死

觀水簾泉歌

水簾瀑布人罕至三級背懸五老峰礧石嵯岈路險
澁深窟風草吟蛇龍自從開闢藏難見可憐彼瀑蒙
稱羨走勢天晴萬古雷流光壑暝常留電亂峰雲走

白日微翫罷催君及早歸鬼神忌才亦好靜恐有驟
雨沾裳衣

用唐初體五首

楊花篇

洛陽三月東風起楊花飛入千門裏只見朝縈上苑
烟那知夕逐東流水苑烟流水無休歇暖日輕盈度
仙闕趙女瑤臺貯綵霞班娘團扇啼明月綵霞明月
幾沉輝陌上行人亂撲衣征夫柳塞愁看鴈少婦香
閨懶上機柳塞香閨萬餘里草色連天度隴水玉門
關外雪猶飛章臺樹裏風先起誰家浪子千金馬平
明挾彈章臺下頭上羅巾玳瑁簪腰間寶鉞珊瑚把
踏絮來尋賣酒家持香坐調當壚者當壚美女怨陽
春笑掇楊花襯繡裯青樓薄暮難消遣白雪漫天愁
殺人冥冥漠漠春無極此時惟有楊花色一朝風雨
靡蕪爛獨慘垂條三嘆息

明星篇

正德間早起聞內教場砲喊之聲作此篇也

明星出地一丈高天門沉沉魚鑰動沙堤露下玉珂
寒直廬雞唱金蓮重千門萬戶曉鐘發明星漸高河
漸沒燦爛疑侵翔鳳樓依稀故抱飛龍闕鳳樓龍闕
帶曾城翠輦朱衣夜夜行黃昏競奏催花宴天明猶
聽打球聲蘭烟桂火輝如日明星迢迢照不入百子

池頭青草生長信宮中紫苔集草色苔香秋復春此
目乘槎若問津明星曉落宵還見白髮黃金愁殺人

漢京篇

漢京臨帝極復道衆星羅烟花開甸服錦繡列山河
山河自古稱佳麗城中半是王侯第峻閣重樓夾道
懸雲房霧殿森虧蔽牧豚賣珠登要津樊侯亦是鼓
刀人時來叱咤生風雨奄見吹嘘走鬼神平津結兄
蓋侯弟杯酒相看何意氣執鞭盡是虎賁郎守門不
說長安尉長安烽火入邊城挺劔辭君萬里行去日
千官遮馬餞歸來天子降階迎朱弓尚抱流沙月寶
鉞常飛翰海星不分燕然先勒石真教麟閣後標名

豈知盛滿多仇忌可惜榮華如夢寐地宅田園奪與
人丹書鐵券成何事霍氏門墻狐夜號魏其池館長
蓬蒿三千劔客今誰在十二珠樓空復高後車不戒
前車覆又破黃金買金谷洛陽亭榭與山齊北邙車
馬如雲逐陰郭豪華真可憐雲臺將相珥貂連當時
却恠桐江叟獨着羊裘伴帝眠

去婦詞

正德元年戶部尚書韓文暨內閣師保等咸相
繼去位李子作此詞也

孔雀南飛鴈北翔含顰攬涕下君堂繡幙空留並齒
菑羅袂尚帶雙鴛鴦齒菑鴛鴦誰不羨人生一別何

由見只解黃金頃刻成那知碧海須臾變賤妾甘爲
覆地水郎君忍作離弦箭憶昔嫁來花滿天賤妾郎
君俱少年瑤臺築就猶嫌惡金屋粧成不論錢重樓
複道天中起結綺臨春照春水宛轉流蘇夜月前
迷寶瑟烟花裏夜月烟花不相待安得朱顏常不改
若使相逢無別離肯放馳波到東海薄命難交姊妹
知衰年恨少姑嫜在長安大道接燕川鄰里携壺舊
路邊妾悲妾怨憑誰省君舞君歌空自憐郎君豈是
會稽守賤妾寧同會稽婦郎平幸愛千金軀但願新
人故不如

蕩子從軍行

蕩子從軍行者本駱氏蕩子從軍賦也余病其
聲調不類於是改焉

胡兵十萬起妖氛漢騎三千掃陣雲隱隱地中鳴戰
鼓迢迢天上出將軍邊沙遠離風塵氣塞草常萎霜
露文蕩子辛苦十年行回首關山萬里情才聞突陷
賢王陣又遣分圍右校營紛紛鐵騎朝常警寂寂銅
焦夜不鳴滄波積凍連蒲海雨雪凝寒遍柳城地分
玄微指青波關塞寒雲本自多嚴風凜凜將軍樹苦
霧蒼蒼太史河揚麾拔劍先挑戰征旆凌沙犯霜霰
樓船一舉爭沸騰烽火四連相隱見戈文耿耿懸落
星馬足駸駸擁飛電終當取俊效先鳴豈暇論功稱

後殿征夫行樂踐榆溪倡婦銜怨坐空閨薜蘿舊曲
終難贈芍藥新詩豈易題池前對怯鴛鴦伴庭際羞
看桃李蹊蕩子別來年月久賤妾空閨更難守鳳凰
樓上罷吹簫鸚鵡杯中臨勸酒同道書來一鴈飛此
時緘怨下鳴機已剪鴛鴦帖夜被更薰蘭麝染春衣
屏風宛轉蓮花帳惺月玲瓏翡翠幃箇日新粧如復
罷祇應含笑待郎歸

長短句三首

沈大夫行

沈大夫遺我以凜冽玉壺之冰報汝以離離朱瑟之
繩繩以發凌雲絕響之妙曲冰以滌卓犖磊砢之清
膺此曲可以崛地懿揚天經宣融風召遐齡奏之敬
姜室允宜軻毋庭沈大夫奉 詔且還家松江鱸魚
白躍玉土居斫筭如斫麻烹羊擊鼓會親戚太守長
吏爭趣車猗乎嘉哉男兒生不顯親譬如錦衣夜行
雖貴何足誇

雪山歌送萬子

雪山高哉崕乎岌兮吾不知幾千萬仞但見雲峰之
崔巍巖冰陵競縞壑熒石晶矐而萃嶽兮懸猱不得
度飛鳥何由迴大峰如老翁冕珮凌紫埃諸峰似兒
孫羅列芙蓉開江日洶湧地軸動孤光倒曳生奔雷
岌乎崕哉雪山之高不可以攀陟斧斤不入松栢如

麻霜幹翳蔽雲根槎枒滲膏結苓實輪困走龜蛇君
今策駟過其下車徒滾滾如飛沙何不斲取松下苓
獻之堂上翁上以介壽考下以召禎祥噫吁戲雪山
之高吾不可得而名惟有峨眉玉壘萬古遙相望

廣州歌送羅叅議

麗哉遐平廣之爲州兮闢炎區奧雄跨乎南隲天作
五嶺奠玄武排空下走何崔嵬拓邦幾千祀浩蕩人
文開秦還漢往不復識但見古城蒼蒼生綠萊上則
盤岡曲丘龍蜿虎蹲其下膏場繡澗掩曖而渟洄水
銀丹沙布平地珍錯奚翅犀與瑰夷舲賈舶競追逐
百首浩淼誰曾回土產之異尚如此何況四民者挺

然叅三才君今縮牒向南去清風吹袂心悠哉崢嶸
五羊城側有千尺臺曩昔聞君坐其上醉睨滄溟如
一杯是時榕蹊雨初霽茉莉霜成堆君嘗夢遊而神
適兮豈知七載還復來男兒成名貴及早英雄多少
理塵埃羨君青鬃結 明主出叅方岳聲如雷金章
紫綬不可以幸致如君者謂非歷塊之龍媒羅浮三
千六百丈矧律倚窮隈巨鰲戴之與波下上三十五
蓮峰照耀雲中輝羣仙跨飛龍流影亂岩霏我欲從
之嘆無術送君翹首空徘徊

用張王體二首

冰車行

黃門飛鞚西北趨白馬如龍血如珠萬人齊呼水窖
開大車小車如山來但見風行九市陌寧知玉積五
侯宅道傍暍士僵闌干唇乾口燥真大難侯門晏罷
夜烏起朱殘粉落明星裏君不見積水化作堂前水

鹽井行

山頭井乾生棘蒿山下井塌不可熬官司白牌促上
庾富家典牛貧典女誰其使之華陽賈華陽賈子多
少年擁金調妓高樓邊夜馳白馬迎場吏曉貫青絲
還酒錢君不見場吏乘耐氣如虎鹽丁一語遭箠楚

用李賀體一首

清夜引

桂魄團團霜兔泣玉龍夜吟冰喉澁仙人起踏白芙
蕖手撚一枝珊瑚株伏猊香噴紅麴瑜蠟鳳啼春暇
捲鬚九華丹焰奪行月五虬轆雲聲軋軋銀箏翠管
聲咿啞繁謳雜舞懽意匝盤中紫棗大於瓜誰其擊
之萼綠華雙桂透迤頭兩丫密情芳緒芳且嘉瓊瑛
夜半重重羽偷樾小兒安得至

空同先生集卷第二十